

# Cunter l'iniziativa segirezza d'abitar per pensiunads

Savognin: Radunanza da delegads da la pcd grischuna

DA GION NUTEGN STGIER / ANR

■ Per l'emprima giada suenter sia elecziun sco president da la Partida cristiandemocratica da noss chantun (pcd) ha cusseglier dals chantuns Stefan Engler manà la radunanza da delegads. Tema central da quella è sta da decider pertutgant las parolas da la votaziun chantunala e da las trais votaziuns federalas dals 23 da settember 2012. Savognin è sta lieu da la radunanza da delegadas e da delegads dal pcd grischuna. L'entira prominenza politica da la pcd da noss chantun è stada preschenta en la chapitala da Surses. Cusseglier dals chantuns e dapi quatter mais president da la pcd grischuna, Stefan Engler, ha pudì beneventar tranter auter Elita Florin-Caluori, la nova presidenta dal cussegl grond. Ella saja dapi Ida Derungs pir la segunda dunna da la pcd dal Grischun che presideschia il parlament chantunal. Preschents a Savognin èn er stads cusseglier guvernativ Mario Cavigelli e cusseglier naziunal Martin Candinas. Els dus sajan sa vivids en bain en lur uffizis e prestian buna lavur, ha ditg Stefan Engler. Plaschaivel saja cunzunt che Martin Candinas appartegnja da nov a la suprastanza da la pcd svizra, ha ditg il cusseglier dals chantuns. A pled è er vegnì Patric Vincenz, il vicepresidente da la pcd Alvra/Surses e president da vischnanca da Savognin. El ha cunzunt mess a cor a las delegadas ed als delegads da sustegnair ils 25 da november 2012 la votaziun concernent la taxa turistica unifitgada. Elita Florin-Caluori, la nova presidenta dal cussegl grond, ha ditg che ses motto en quel onn presidial saja il suandant: «carstgauns e lavur». Il vair misteri dal success saja l'entusiassem e quai quintia er per la politica. Ella spera che la politica renconuschia bunas fatschentas, s'engaschia per bunas cundiziuns da basa per quellas e cunzunt er per plazzas da lavur e plazzas d'emprendissadis per la generaziun da damaun.



Cusseglier naziunal Martin Candinas ed Elita Florin-Caluori, la presidenta dal cussegl grond, a chaschun da la radunanza da delegads da la pcd grischuna a Savognin.

FOTO G. N. STGIER

## Tuts en sa s'alzads per Leon Schlumpf

Stefan Engler ha ditg che en quels quatter mais sco president haja el constatà che la famiglia da la pcd haja bleras personas iniziatives e quai dals giuvens commembers sur la fracziun fin tar ils commembers pli vegls. Er en l'avegnir saja la pcd grischuna dumandada gist en lieus nua ch'ella tutgia tar ils victorisads. Tematicamain haja la pcd dal Grischun d'investar anc bler sch'ella veglia er discurren là nua ch'ella va per l'avegnir e per las perspectives dal Grischun. Dad esser critic saja betg mo lubì, mabain in duair. Menziunà ha el en spezial las votaziuns da la taxa turistica unifitgada, quella per giesu olimpics en noss chantun, in nov sistem electoral per il cussegl grond e per las fusiuns da vischnancas che vegnan cumandadas da sura. El ha er ditg che en l'ave-

gnir vegnia la pcd svizra a collavurar pli stretg cun la pbd svizra e per elecziuns naziunals saja preveda ina colliaziun da glistas. Sa regurdà è Stefan Engler er da dus commembers fidaivels da la pcd da noss chantun ch'en morts da curt. Quai è Alex Schmid da Val e Crispin Foffa da Müstair. Blers buns plects ha Stefan Engler gi per l'anterieur cusseglier federal Leon Schlumpf ch'è mort ils 7 da fanadur 2012. Per el e per ils ulteriurs dus defuncts èn las 65 delegadas e delegads, sco er ils numerus giasts sa s'alzads da lur sutgas.

## Naginas discussiuns

Gi da decider han ils preschents lura las parolas da la pcd grischuna per la votaziun chantunala e per las trais votaziuns federalas dals 23 da settember 2012. Livio Zanolari, deputà dad Igis, ha pre-

schentà la votaziun dal concus federal davart la promoziun da la furmazion musicala da la giuventetgna. Cun gronda pluralità han las delegadas ed ils delegads decidì da sustegnair quella. L'iniziativa dal pievel segirezza d'abitar per personas pensiunadas è vegnida preschentada da Silvia Casutt-Derungs, la deputada da Falera. Quella iniziativa refusa la pcd da noss chantun cun 46 na e 17 gea. Unisono ha la direenziun da la pcd grischuna decidì da dir na a l'iniziativa dal pievel «proteccziun cunter il fimar passiv». Per sustegnair, e quai cun gronda pluralità, èn ils preschents stads per la votaziun chantunala concernent la revisiun parziala da la constituziun chantunala (refurma dal territori). Vegnida preschentada è quella da deputà Alessandro Della Vedova da Poschiavo.